



REPUBLIKA E SHQIPËRISË

KËSHILLI I EMËRIMEVE NË DREJTËSI

VENDIM

Nr. 30, datë 17.09.2025

PËR VLERËSIMIN DHE PIKËZIMIN E KANDIDATURËS SË ZONJËS ALMA FASKAJ NË VENDIN VAKANT, PËR GJYQTAR NË GJYKATËN KUSHTETUESE, SHPALLUR NGA GJYKATA E LARTË MË DATË 11.12.2024

Këshilli i Emërimeve në Drejtësi, i përbërë nga :

Sokol Sadushi	Kryetar
Marjana Semini	Zëvendëskryetare
Ilir Toska	Anëtar
Alma Muça	Anëtare
Fuat Vjerdha	Anëtar
Enkela Vlora	Anëtare relatore
Irma Balli	Anëtare
Etien Kapo	Anëtar
Nafije Hasko	Anëtar

Asistuar nga sekretare Katerina Bilo me praninë e Avokates së Popullit, znj. Erinda Ballanca, në cilësinë vëzhguesit të përhershëm të mbledhjeve dhe veprimtarisë së Këshillit të Emërimeve në Drejtësi (KED), në mungesë të përfaqësuesve të autorizuar të subjekteve të ftuara sipas ligjit për pjesëmarrje, në mbledhjen e datës 17.09.2025, mori në shqyrtim çështjen që i përket:

KANDIDATIT: Alma Faskaj (Vokopola)

OBJEKTI: Kandidim për gjyqtar në Gjykatën Kushtetuese në vendin vakant të shpallur nga Gjykata e Lartë më datë 11.12.2024.

KËSHILLI I EMËRIMEVE NË DREJTËSI

Pasi dëgjoi relatimin e anëtares së KED-it, zonjës Enkela Vlora, lidhur me mënyrën e procedimit të ndjekur për verifikimin e kandidatit, dhe si bisedoi çështjen në tërësi,

VËREN:

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

I. Rrethanat e çështjes

1. Në përfundim të procedurës së verifikimit për këtë kandidat, Këshilli i Emërimeve në Drejtësi (në vijim referuar edhe si KED) me vendimin nr. 19, datë 26.06.2025 ka vendosur “*Lejimin e kandidimit të kandidatit Alma Faskaj (Vokopola), në vendin vakant për gjyqtar në Gjykatën Kushtetuese, shpallur nga Gjykata e Lartë në datën 11.12.2024*”.

2. Në zbatim të dispozitave të ligjit nr. 8577/2000 dhe të ligjit nr. 115/2016, si edhe atyre të Kreut IV (pikat 27-38) të vendimit nr. 5, datë 02.04.2019 “*Për kriteret dhe procedurën e vlerësimit, pikëzimit dhe renditjes së kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, anëtarja e Këshillit, znj. Enkela Vlora, në cilësinë e relatores të vendit vakant të cituar më lart, ka realizuar veprimet përgatitore të procedurës së vlerësimit dhe pikëzimit të kandidatëve, njëkohësisht me procedurat e verifikimit të tyre.

3. Këshilli i Emërimeve në Drejtësi, pasi shqyrtoi procedurat e ndjekura gjatë veprimeve përgatitore nga relatorja dhe plotësinë e dokumentacionin të paraqitur për vlerësim nga secili kandidat, dëgjoi mendimin e Avokatit të Popullit lidhur me mënyrën e procedimit të ndjekur për përgatitjen e dokumentacionit të kandidatëve, me vendimin e datës 09.09.2025 ka vendosur fillimin e procedurave të vlerësimit, pikëzimit dhe renditjes së kandidatëve të lejuar për vendin vakant për gjyqtar në Gjykatën Kushtetuese, vakancë e krijuar në Gjykatën Kushtetuese pas deklarimit të mbarimit të mandatit të gjyqtarës Holta Zaçaj.

4. Bazuar në aktet që janë dorëzuar nga kandidatja Alma Faskaj (Vokopola) në momentin e kandidimit dhe gjatë fazës përgatitore të procedurës së vlerësimit, anëtarja e Këshillit, relatore e vendit vakant në të cilën, kjo candidate ka paraqitur kandidaturën e saj, hartoi relacionin përkatës për gjetjet në procedurën e vlerësimit të kësaj candidateje për gjyqtar në Gjykatën Kushtetuese, i cili, i është njoftuar kandidatës.

5. Kryetari i Këshillit ka thirrur mbledhjen e Këshillit në datën 16.09.2025, ora 13:00, për zhvillimin e intervistës dhe testimin e njohurive të gjuhës së huaj me kandidatët e lejuar. Kandidatja Alma Faskaj (Vokopola) përzgjedhi të intervistohet në gjuhë të huaj (italisht), për pasojë me vendimin nr. 26, datë 11.09.2025 të KED, u vendos marrja e ekspertit të gjuhës së huaj. Në datë 12.09.2025, kandidatja u njoftuar për vendimin për caktimin e datës së intervistës dhe testimin të gjuhës së huaj si dhe caktimin e ekspertës. Kandidatja mori dijeni, duke deklaruar se nuk ka shkaqe papajtueshmërie me ekspertin.

6. Intervista mbi motivimin e kandidimit me kandidaten Alma Faskaj (Vokopola) u zhvillua në mbledhjen e Këshillit të datës 16.09.2025.

II. Parimet dhe burimet ligjore që udhëheqin vlerësimin

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

7. Këshilli i Emërimeve në Drejtësi (KED) vepron mbi bazën e Kushtetutës dhe Ligjit nr. 115/2016, duke zbatuar rregullat procedurale të Vendimit nr. 4, datë 11.03.2019 (procedura e verifikimit) dhe metodologjinë e Vendimit nr. 5, datë 02.04.2019 (kriteret/peshët e pikëzimit). Këto akte garantojnë kompetencën e organit, rregullshmërinë formale dhe mjetet e transparencës për një vendimmarrje të arsyetuar, të verifikueshme dhe të drejtë. Parimet mbizotëruese: (i) *ligjshmëria*, (ii) *barazia dhe mosdiskriminimi*, (iii) *paanësia dhe shmangia e konfliktit të interesit*, (iv) *e drejta e dëgjimit dhe transparenca*, (v) *proporcionaliteti dhe arsyetimi*, (vi) *parashikueshmëria dhe konsistenca në zbatimin e kriterëve*.

8. *Rregullshmëria procedurale (shorti, njoftimet, verifikimi, votimi)*. Procesi i vlerësimit nisi me caktimin me short të relatorit dhe përcaktimin e këshilltarëve ligjorë; vijoi me njoftimet ndaj institucioneve dhe kandidatëve, administrimin e materialeve, verifikimet sipas Vendimit nr. 4 (përfshirë kontrollet e integritetit, pasurisë dhe papajtueshmërisë) dhe me mbledhjen ku bëhet diskutimi i raporteve dhe votimi i hapur. Publikimi i rezultatit dhe përgatitja e “raportit të arsyetuar” siguron transparencën e aktit përfundimtar.

9. Respektimi i këtyre hapave është kusht i domosdoshëm për ligjshmërinë e pikëzimit: dështimi në cilindo hap do të cënonte aktin. Në rastin konkret, dokumentet e administruara dhe tabelat përfundimtare pasqyrojnë ecuri të përputhur me skemën ligjore.

10. *Metodologjia: kriteret, pesha dhe “mesatarja kolegjiale”*. Metodologjia e KED strukturohet në tri blloqe: (1) Meritat Profesionale (deri 60 pikë), (2) Meritat Morale (deri 30 pikë), (3) Meritat Organizative/Drejtues-Menaxheriale (deri 10 pikë). Brenda secilit bllok, nën-kriteret dhe indikatorët janë të paracaktuar (p.sh., vjetërsi/arsim/“pesë dokumente”/gjuhë për bllokun profesional; integritet/reputacion për bllokun moral; platforma/vizioni për bllokun organizativ). Çdo anëtar i KED vlerëson individualisht; rezultati përfundimtar është mesatarja e pikëve të 9 anëtarëve (“mesatarja kolegjiale”). Kjo teknikë zvogëlon ndikimin e çdo skaji individual (shumë i lartë ose shumë i ulët) dhe e bën totalin produkt të një vlerësimi kolegjial, jo të një individi. Për rrjedhojë, edhe kur anëtarët ndryshojnë në nuanca, ligjshmëria e vendimit ruhet nëse kriteret zbatohen njësoj dhe arsyetimi është i pranishëm.

11. *Testet e ligjshmërisë së vlerësimit (kontrolli i brendshëm i KED)*. Për të qenë i qëndrueshëm juridikisht, pikëzimi kalon disa “teste” të brendshme kontrolli:

- Testi i kompetencës dhe formës: organi i duhur, akti në formën e ligjit dhe rregullit të brendshëm; procesverbalet dhe tabelat ekzistuese;
- Testi i procedurës: shorti, njoftimet, verifikimi, e drejta e dëgjimit, mbledhja, votimi i hapur, raportimi i arsyetuar.
- Testi i kriterit: zbatimi i njëjtë i metodologjisë (60/30/10) për të gjithë kandidatët, pa shmangie nga treguesit e paracaktuar.
- Testi i barazisë: trajtim i njëjtë i situatave të njëjta dhe arsyetim i diferencave kur ekzistojnë.
- Testi i proporcionalitetit: pikët në raport të drejtë me provat (as nën- e as mbi-vlerësim i pajustifikuar).
- Testi i arsyetimit: lidhje e qartë “provë → nën-kriter → pikë → total”.

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

- Testi i transparencës: publikim i renditjes dhe tabelave, mundësia e verifikimit publik.

III. Vlerësimi i Këshillit të Emërimeve në Drejtësi

12. Në përfundim të intervistës, bazuar në të dhënat e nxjerra nga biseda mbi motivimin e kandidimit, si edhe bazuar në aktet dhe dokumentet që janë dorëzuar nga kandidatja Alma Faskaj (Vokopola) në momentin e paraqitjes së kërkesës për kandidim, dokumente të paraqitura prej saj sipas kërkesave të Këshillit, si edhe shkresa dhe të dhëna të tjera të kërkuara apo të ardhura zyrtarisht nga institucione të ndryshme, Këshilli ka vënë në bisedim vlerësimin dhe pikëzimin e kandidates Alma Faskaj (Vokopola) për secilin nga kriteret e vlerësimit të përcaktuara:

- a) në pikën 4 dhe 5 të nenit 125 të Kushtetutës;
- b) në nenin 7/a të ligjit nr. 8577/2000 “Për organizimin dhe funksionimin e Gjykatës Kushtetuese të Republikës së Shqipërisë”, të plotësuar, për aq sa nuk përcaktohet ndryshe në këto dispozita, me kriteret e përgjithshme të vlerësimit të parashikuara në nenin 240 të ligjit nr. 115/2016;
- c) në detajimin e mëtejshëm të kriterëve ligjore të posaçme dhe të përgjithshme të vlerësimit dhe përcaktimit më të hollësishëm të peshës specifike të tyre në pikëzimin dhe renditjen e kandidatëve të treguar në Kreun II, në Kreun V dhe në Shtojcën 1 të Vendimit nr. 5 datë 02.04.2019 “Për kriteret dhe procedurën e vlerësimit, pikëzimit dhe renditjes së kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”;
- ç) në shpjegimet e hollësishme lidhur me metodologjinë mbi të cilin bazohet në vlerësimi dhe caktimi i pikëve të miratuar nga Këshilli i Emërimeve në Drejtësi me vendimin nr. 51 datë 21.06.2019 “Për miratimin e metodologjisë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese”.

A. Meritat profesionale – Historiku Arsimor dhe Profesional

Vjetërsia në profesion

13. Në shkronjën “a” të pikës 3 të nenit 7/a të ligjit nr. 8577/2000, përcaktohet si kriter vlerësimi “Vjetërsia në profesion”. Ndërkohë që, sipas nenit 125 të Kushtetutës dhe nenit 7/a pika 2 shkronja “a” të ligjit nr. 8577/2000, përbën kusht lejimi kandidimi që kandidati të ketë së paku 15 vjet përvojë profesionale si gjyqtarë, prokurorë, avokatë, profesorë ose lektorë të së drejtës, nëpunës (jurist) të nivelit të lartë në administratën publike.

14. Prandaj, Këshilli vlerëson me pikë kohëzgjatjen e të gjithë përvojës profesionale të secilit kandidat, në maksimum deri në 4 pikë, sikurse orientohet në tabelën e përshkallëzuar të pikëzimit të vjetërsisë në profesion të treguar në Metodologjinë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51, datë 21.06.2019.

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

15. Sipas jetëshkrimit dhe dokumentacionit të administruar në procedurën e verifikimit të kandidaturës dhe në kuadër të veprimeve përgatitore të procedurës së vlerësimit, rezulton që kandidatja Alma Faskaj (Vokopola), ka ushtruar veprimtaritë profesionale si më poshtë:

- **Gjyqtare pranë Gjykatës së Rrethit Gjyqësor Lushnjë, 30.08.1995 - 23.08.1996.** Kohëzgjatja në detyrë: 11 (njëmbëshjetë) muaj e 24 (njëzet e katër) ditë;
- **Juriste pranë Këshillit të Rrethit Lushnje, 09.12.1996 - 31.07.1998.** Kohëzgjatja në detyrë: 1 (një) vit, 7 (shtatë) muaj, 22 (njëzet e dy) ditë;
- **Asistent pedagog pranë Fakultetit të Drejtësisë, Universiteti i Tiranës, 01.08.1998 - 15.08.2000;** Kohëzgjatja në detyrë: 2 (dy) vjet e 14 (katërmëdhjetë) ditë;
- **Ndihmëskomisioner pranë Avokatit të Popullit, 16.08.2000 - 01.05.2001;** Kohëzgjatja në detyrë: 8 (tetë) muaj e 15 (pesëmbëdhjetë) ditë;
- **Këshilltar pranë Avokatit të Popullit, 01.05.2001 - 05.12.2011.** Kohëzgjatja në detyrë: 10 (dhjetë) vjet, 7 (shtatë) muaj e 4 (katër) ditë;
- **Ndihmës Ligjor pranë Prokurorisë së Përgjithshme, 05.12.2011 - 01.04.2014.** Kohëzgjatja në detyrë: 2 (dy) vjet, 3 (tre) muaj e 27 (njëzet e shtatë) ditë.
- **Këshilltar në Shërbimin e Përafrimit të Legjislacionit (Kuvendi), 01.04.2014 – 17.06.2017¹.** Kohëzgjatja në detyrë: 3 (tre) vjet, 2 (muaj) e 16 (gjashtëmbëdhjetë) ditë;
- **Komisionere pranë Komisionit të Pavarur të Kualifikimit, 17.06.2017 - 31.12.2024.** Kohëzgjatja në detyrë: 7 (shtatë) vjet, 6 (gjashtë) muaj e 14 (katërmëdhjetë) ditë.

15.1 Gjithashtu, nga dokumentacioni i shqyrtuar kandidatja Alma Faskaj (Vokopola) ka deklaruar se ka përmbyllur edhe veprimtaritë profesionale të mëposhtme:

1. 2010 - Maj 2017 - Lektore në trajnimin fillestar dhe vazhdues, Shkolla e Magjistraturës.
2. Gusht 2004- Maj 2017 - Pedagoge e jashtme në Fakultetin e Drejtësisë Jo Publik "Luarasi", "Justizia", "Justiniani".

16. Mbështetur në të dhënat e sipërcituara, rezulton se kandidatja Alma Faskaj (Vokopola) ka ushtruar veprimtari profesionale në fushat e përcaktuara sipas nenit 125 të Kushtetutës dhe nenit 7/a të ligjit nr. 8577/2000. Gjithashtu, referuar të dhënave të mësipërme, rezulton se kandidatja Alma Faskaj (Vokopola), ka gjithsej **29 vite e 16 ditë vjetërsi** në profesion si jurist. Ndërsa vjetërsi profesionale e kandidatit si jurist i nivelit të lartë dhe në fushën e veprimtarive të tjera profesionale sipas përcaktimeve të nenit 125 të Kushtetutës dhe nenit 7/a të ligjit nr. 8577/2000, kandidatja ka në total **25 vite 4 muaj e 10 ditë**, duke përllogaritur funksionet e ushtruara prej saj në detyrën si: (i) gjyqtare; (ii) Ndihmëskomisionere dhe Keshilltare pranë Avokatit të Popullit; (iii) Ndihmës Ligjor pranë Prokurorisë së Përgjithshme; (iv) Këshilltar në Shërbimin e Përafrimit të Legjislacionit (Kuvendi); si dhe (v) Komisionere pranë Komisionit të Pavarur të Kualifikimit.

¹ **Sqarim:** Duke qenë se në librezë punë nuk është shënuar data e largimit nga detyra “Këshilltar në Shërbimin e Përafrimit të Legjislacionit (Kuvendi)”, për llogaritjen e kohëzgjatjes së qëndrimit në këtë funksion është llogaritur si datë përfundimi i marrëdhënies së punës data 17.06.2017, datë në të cilën ka filluar ushtrimin e detyrës së Anëtarit të Komisionit të Pavarur të Kualifikimit, sipas përmbajtjes së librezës së punës.

17. Për këto arsye, për kriterin e vlerësimit “*vjetërsia në profesion*”, nisur nga ushtrimi i veprimtarive profesionale të sipërcituara/29 vite e 16 ditë vjetërsi në profesion si jurist/, Këshilli çmoi ta vlerësojë kandidaten Alma Faskaj (Vokopola) me **36 Pikë**.

Historiku Arsivor

18. Në shkronjën “d” të pikës 3 të nenit 7/a të ligjit nr. 8577/2000, përcaktohet si kriter vlerësimi edhe ecuria gjatë kryerjes së arsimit të lartë me një notë mesatare jo më pak se 8 ose të barasvlershme me të, ndërkohë që edhe shkronja “c” e pikës 1 të nenit 240 të ligjit nr. 115/2016 kërkon të vlerësohen rezultatet gjatë studimeve në ciklet e arsimit të lartë.

19. Prandaj, Këshilli vlerëson me pikë ecurinë gjatë kryerjes së arsimit të lartë me një notë mesatare jo më pak se 8 ose të barasvlershme me të, të secilit kandidat, sipas përshkallëzimit me 1 pikë të notës mesatare mbi 8 dhe me 2 pikë të notës mesatare mbi 9, sikurse orientohet në Metodologjinë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51, datë 21.06.2019.

20. Sipas jetëshkrimit dhe dokumentacionit të administruar në procedurën e verifikimit të kandidaturës dhe në kuadër të veprimeve përgatitore të procedurës së vlerësimit, rezulton që kandidatja Alma Faskaj (Vokopola) ka përfunduar studimet universitare pranë Fakultetit të Drejtësisë, Universiteti i Tiranës gjatë viteve 1991-1995, me notë mesatare **10**, e njëjtë me vetëdeklarimin e bërë nga kandidatja Alma Faskaj (Vokopola) në jetëshkrimin e tij si dhe i është dhënë Medalje e Artë për përfundimin e studimeve me rezultate të shkëlqyera në vitin akademik 1994-1995.

21. Për sa më lart, nisur nga përlllogaritja e kryer nga Këshilli sipas të cilës nota mesatare e arritur nga kandidatja Alma Faskaj (Vokopola) gjatë studimeve dhe diplomimit në Fakultetin e Drejtësisë në Universitetin e Tiranës është 10, për kriterin e vlerësimit “*historiku arsimor*”, Këshilli çmoi ta vlerësojë kandidaten me **18 Pikë**.

Kualifikime Pasuniversitare

22. Në pikën 3 të nenit 7/a të ligjit nr. 8577/2000 dhe pikat 1 e 4 të nenit 240 të ligjit nr. 115/2016, si edhe në vendimin nr. 5 datë 02.04.2019 të Këshillit të Emërimeve në Drejtësi të nxjerrë në bazë e për zbatim të ligjit, përcaktohet si kriter vlerësimi kualifikimet pasuniversitare. Ky kriter vlerëson llojin dhe nivelin e angazhimit të kandidatit në ndjekjen e veprimtarive të kualifikimit profesional që mundësojnë arritjen e një profesionalizmi më të madh në shërbim të ushtrimit të funksioneve dhe detyrimeve profesionale të tilla si, pasja e titujve akademikë, gradave shkencore, ecuria dhe kryerja e kualifikimeve pasuniversitare, studimeve dhe specializimeve afatgjata (përfshirë Shkollën e Magjistraturës), si edhe kryerja e trajnimeve afatgjata dhe afatshkurtra në fushën e të drejtave kushtetuese, të drejtave të njeriut, si edhe në fusha të tjera të së drejtës.

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

23. Referuar kriterëve ligjore të vlerësimit dhe metodologjisë së pikëzimit, që gjejnë pasqyrim në mënyrë të detajuar në Shtojcën nr. 1 të vendimit nr. 5 datë 02.04.2019 të Këshillit të Emërimeve në Drejtësi, kualifikimeve pasuniversitare, si një nga indikatorët me të cilët vlerësohet niveli profesional i kandidatëve, u janë caktuar në total 8 pikë.

24. Prandaj, në zbatim të ligjit, Këshilli i Emërimeve në Drejtësi vlerëson me pikë llojin e titujve akademikë dhe gradave shkencore, llojin, kohëzgjatjen, fushën dhe vendin e kryerjes së kualifikimeve pasuniversitare, studimeve, specializimeve dhe trajnimeve të kandidatëve, duke pasur parasysh shpërndarjen e pikëve sipas vendimit nr. 5, datë 02.04.2019 të këtij Këshilli, si edhe orientimet që përmbahen në Metodologjinë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51, datë 21.06.2019.

25. Sipas jetëshkrimit dhe dokumentacionit të administruar në procedurën e verifikimit të kandidaturës dhe në kuadër të veprimeve përgatitore të procedurës së vlerësimit, rezulton se kandidatja Alma Faskaj (Vokopola) ka tituj akademik/profesional dhe grada shkencore, në rend kronologjik si vijon:

- Ka përfunduar studimet universitare dhe është diplomuar për periudhën 1991-1995 si “Jurist”, në Universitetin e Tiranës, Fakultetin e Drejtësisë, me notë mesatare 10.
- Gjatë periudhës 2002-2006 ka përfunduar *studime pasuniversitare* në programin “Master në Shkencat Juridike në të drejtë Publike, Universiteti i Tiranës, nota mesatare 9.57 (vetë kandidati ka referuar në jetëshkrim mesataren 9.7/ka mbrojtur mikrotezën me temë “Procedimi administrativ sipas Kodit të Procedurave Administrative në Republikën e Shqipërisë”.
- Në jetëshkrimin e kandidatit dhe sipas akteve bashkëlidhur dosjes së kandidimit, evidentohet se kandidati ka fituar gradën shkencore “Doktor” me diplomë doktrate nr. 828, datë 09.06.2014, në të Drejtën Publike, pranë Fakultetit të Drejtësisë, Universiteti i Tiranës, duke u vlerësuar “Shumë mirë” për disertacionin me temë “Procedimi administrativ në Republikën e Shqipërisë”;

26. Sipas Metodologjisë së Vlerësimit dhe Caktimit të Pikëve për kandidatin do të mbahet në vëmendje se ka fituar gradën shkencore “Doktor” me diplomë doktrate nr. 828, datë 09.06.2014, në të Drejtën Publike, pranë Fakultetit të Drejtësisë, Universiteti i Tiranës. Për këto arsye, për këtë kriter vlerësimi, Këshilli çmoi ta vlerësojë kandidaten Alma Faskaj (Vokopola) me **36 Pikë**.

27. Për treguesin e vlerësimit “Trajnimet e tjera”, vlerësohen veçanërisht trajnime me një kohëzgjatje minimale 2 javore, duke mbajtur parasysh edhe numrin, llojet, tematikat dhe kohëzgjatjet e përgjithshme të trajnimeve në fusha të caktuara, institucionet trajnuese, si dhe nëse trajnimet janë shoqëruar me një certifikatë vlerësimi. Lidhur me këtë kriter vlerësimi, Këshilli mund të caktojë deri në 2 pikë.

28. Nga akti dokument i jetëshkrimit të kandidatës që ndodhen në dosjen e kandidimit, rezulton se kandidatja Alma Faskaj (Vokopola) deklaron se ka kryer këto trajnime:

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

Akte dorëzuar fizikisht pranë KED:

Periudha: 8 – 30 Maj 1998

Tematika: Pjesëmarrje në programin e bashkëpunimit teknik në fushën “Metoda Efektive e Mësimdhënies”

Institucioni trajnues: Agjencia për Zhvillim Ndërkombëtar të Qeverisë së Shteteve të Bashkuara të Amerikës, në bashkëpunim me Qeveritë e tjera.

Vendi: Tiranë, Shqipëri

Periudha: 14 - 17 Mars 2001

Tematika: “ëorkshoop-i i Kombeve të Bashkuara në Ndërtimin e Kapaciteteve për Raportimin e Traktateve për të Drejtat e Njeriut”

Institucioni trajnues: Zyra për Komisionerin e Lartë për të Drejtat e Njeriut, Kombet e Bashkuara

Vendi: Tiranë, Shqipëri

Periudha: 15-16 Maj 2014

Tematika: Konferencë Shkencore Ndërkombëtare “Sundimi i ligjit në Shqipëri: Sfidat dhe perspektivat”

Institucioni trajnues: Departamenti i të Drejtës Penale, Fakulteti i Drejtësisë, Universiteti i Tiranës, në bashkëpunim me Fondacionin “Konrad Adenauer”.

Vendi: Tiranë, Shqipëri

Periudha: Maj – Nëntor 1999

Tematika: Seminar trajnimi në projektin JEP “Hermes eu Tempus- seri e vizitave studimore.

Institucioni trajnues: Qendra Evropiane e së Drejtës Publike

Vendi: Universiteti i Athinës, Universiteti i Bordeaux, Universiteti i Napolit

Periudha: 02 - 23 Tetor 1999

Tematika: “Mësimdhënies dhe Menaxhimit të Kursit”

Institucioni trajnues: Instituti Ndërkombëtar i së Drejtës, në bashkëpunim me Universitetin Georgetown, Washington DC

Vendi: Washington DC

Periudha: 25, 26 dhe 27 Maj 2010

Tematika: Sesioni i pestë i trajnimit për bashkëpunëtorët e ndërmjetësve anëtarë të AOMF me temën “Roli i ndërmjetësit në reformën e administratës së ndërmjetësve”,

Institucioni trajnues: Qendra e Trajnimit dhe Shkëmbimit të Ndërmjetësimit

Vendi: Rabat, Marok

Periudha: 05 – 09 Korrik 2010

Tematika: “Trajnimi i trajnerëve të formimi fillestar dhe të vazhduar”, organizuar në kuadër të Projektit “Mbështetje për forcimin e sistemit gjyqësor në Shqipëri”.

Institucioni trajnues: Ambasada Spanjolle, AECID dhe Shkolla e Magjistraturës së Republikës së Shqipërisë

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

Vendi: Tiranë, Shqipëri

Periudha: 03 – 05 Nëntor 2010

Tematika: “Trajnimi i trajnerëve”.

Institucioni trajnues: Ambasada e Republikës së Francës dhe Shkolla e Magjistraturës së Republikës së Shqipërisë

Vendi: Tiranë, Shqipëri

Periudha: 28 – 29 Tetor 2010

Tematika: “Barazia gjinore dhe çështjet e të drejtës familjare”.

Institucioni trajnues: Shkolla e Magjistraturës së Republikës së Shqipërisë në bashkëpunim me INIFEM (pjesë e UN Woman)

Vendi: Tiranë, Shqipëri

Periudha: 25.01.2012

Tematika: “E drejta e lirisë personale; Policia, Prokuroria dhe garancitë e të akuzuarit gjatë hetimit penal”.

Institucioni trajnues: Shkolla e Magjistraturës së Republikës së Shqipërisë në bashkëpunim me Universitetin e Utrecht-it

Vendi: Tiranë, Shqipëri

Periudha: 26 – 30 Shtator 2016

Tematika: Pjesëmarrje në Shkollën Verore Evropiane organizuar me mbështetjen e Kolegjit të Europës, për modulet “1. Situata aktuale dhe kuadri institucional i Integritetit Evropian në Shqipëri; 2. Negociatat: Strategjitë dhe negociimi; 3. Hapat dhe fazat drejt negociatave; 4. Komunikimi në publik i procesit të Integritetit Evropian”.

Institucioni trajnues: Këshilli Kombëtar i Integritetit Evropian; Fondacioni Shoqëria e Hapur për Shqipërinë; Bashkimi Evropian Delegacioni në Shqipëri; College of Europe.

Periudha: 5 – 8 Prill 2004

Tematika: “Si dhe për çfarë të ankohe mi në Gjykatën e Strasburgut”.

Institucioni trajnues: Këshilli i Europës

Vendi: Mali Robit, Shqipëri

Periudha: 04.06.1999 - 04.09.1999

Tematika: Kurs i terminologjisë juridike në gjuhën franceze

Institucioni trajnues: Qendra e Drejtësisë pranë Fondacionit “Shoqëria e Hapur për Shqipërinë (Soros)”

Vendi: Tiranë, Shqipëri

28.1 Nga jetëshkrimi i përditësuar në Gusht 2025, kandidati Alma Faskaj (Vokopola), deklaron se ka kryer edhe këto trajnime, **për të cilat nuk ka dokumentacion:**

Periudha: 19, 20 Dhjetor 2015

Tematika: Programi Help (Human Rights Education for Legal Professionals).

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

Institucioni trajnues: Këshilli i Europës

Periudha: Maj 2001

Tematika: Rreth veprimtarisë së Ombudsmanit të Belgjikës

Institucioni trajnues: Zyra e Ombudsmanit të Belgjikës;

29. Sa më sipër, mbështetur në të dhënat e jetëshkrimit të kandidatës dhe dokumentacionit të administruar në procedurën e verifikimit të kandidaturës, si dhe duke pasur parasysh se kandidatja ka trajnime cilësore në përmbytje të tematikës, ndonëse jo të shumta në numër dhe shtrirje në kohë, për këtë kriter ligjor vlerësimi Këshilli çmoi ta vlerësojë me **16.5 Pikë**.

Njohja e gjuhëve të huaja

30. Në shkronjën “c” të pikës 4 të nenit 240 të ligjit nr. 115/2016, si edhe në vendimin nr. 5 datë 02.04.2019 të Këshillit të Emërimeve në Drejtësi të nxjerrë në bazë e për zbatim të ligjit, përcaktohet si kriter vlerësimi niveli i zotërimit të gjuhëve të huaja.

Prandaj, në zbatim të ligjit, Këshilli i Emërimeve në Drejtësi vlerëson me pikë llojin dhe numrin e gjuhëve të huaja, si edhe nivelin e zotërimit të tyre nga ana e kandidatëve, duke pasur parasysh sasinë e pikëve maksimale përkatëse sipas vendimit nr. 5, datë 02.04.2019 të këtij Këshilli, si edhe orientimet që përmbahen në Metodologjinë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51, datë 21.06.2019.

31. Nga aktet që ndodhen në dosjen e kandidimit, rezulton se kandidatja ka vetëdeklaruar në jetëshkrim se njeh gjuhën frënge (të kuptuarit – shumë mirë; të folurit – shumë mirë; shkrimi – mirë); gjuhën italiane (të kuptuarit – shumë mirë; të folurit – Shumë mirë; Shkrimi – shumë mirë); gjuhën angleze (të kuptuarit – shumë mirë; të folurit – mirë; shkrimi – mirë)

31.1. Kandidati rezulton të ketë depozituar për provimin e zotërimit të gjuhëve të huaja aktet si me poshtë:

- **Dëshmi nr. 5419 të lëshuar nga Fakulteti i Gjuhëve të Huaja**, Universiteti i Tiranës, sipas të cilës vërtetohet se Alma Faskaj (Vokopola) në datë 8.2.2003 ka dhënë provimin e gjuhës italiane, dhe është vlerësuar me 65 pikë nga 100 të mundshme.
- **Dëshmi të lëshuar nga Fakulteti i Gjuhëve të Huaja**, Universiteti i Tiranës, në datë 6.10.1994, sipas të cilës vërtetohet se Alma Vokopola në datë 27.09.1994 ka dhënë provimin e gjuhës frënge, dhe është vlerësuar me notën 6 (gjashtë).

32. Në Metodologjinë e Vlerësimit dhe Caktimit të Pikëve lidhur me këtë kriter vlerësimi citohet ndër të tjera se, për vlerësimin e njohurive për gjuhët e huaja, në rastet kur Këshilli e vlerëson të nevojshme, do të caktojë ekspertë të gjuhës së huaj, të cilët japin mendim për shkallën e zotërimit të aftësive gjuhësore të kandidatit/es. Shkalla e zotërimit të aftësive gjuhësore të kandidatit/es mund të vlerësohet deri në 3 Pikë. Gjithashtu, Këshilli mban parasysh edhe zotërimin e gjuhëve të tjera të deklaruara për të cilat kandidati/ja nuk testohet gjatë intervistës, me kushtin që të jenë të shoqëruara me dokumente vlerësuese të vlefshme për nivelin e

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

njohurive të tyre. Në këtë rast, krahas vlerësimit konkret me pikë për gjuhën e huaj të zgjedhur prej tij/saj për pikëzim, kandidatit/es mund t'i shtohet 1 Pikë.

33. Kandidatja Alma Faskaj (Vokopola), u testua për nivelin e njohurive të gjuhës së huaj *italisht*) dhe sipas ekspertës së caktuar nga Këshilli, shkalla e zotërimit të gjuhës së huaj italiane nga kandidatja Alma Faskaj (Vokopola), është vlerësuar me 2 pikë.

34. Këshilli, vlerësoi të dhënat që përmban dosja e kandidimit nga ku rezulton se kandidati ka paraqitur dokument vlerësues të vlefshëm për aftësitë e tij gjuhësore në gjuhën e huaj (*italisht dhe frëngjisht*) si dhe është testuar nga ekspertja e caktuar nga Këshilli për nivelin e njohurive të gjuhës (*italisht*), për rrjedhojë çmoi ta vlerësojë kandidaten Alma Faskaj (Vokopola) për këtë kriter ligjor vlerësimi, në total me **26 Pikë**.

B. Meritat profesionale – Kualifikimi i Përgjithshëm Profesional

35. Në shkronjën “ç” të pikës 3 të nenit 7/a të ligjit nr. 8577/2000 dhe në shkronjën “a” të pikës 1 të nenit 240 të ligjit nr. 115/2016, si edhe në vendimin nr. 5 datë 02.04.2019 të Këshillit të Emërimeve në Drejtësi të nxjerrë në bazë e për zbatim të ligjit, në lidhje me kualifikimin e përgjithshëm profesional, përcaktohen si kritere vlerësimi, në bazë të treguesve shkencorë, performanca e dalluar dhe rezultatet e larta në ushtrimin e profesionit, që mbështetet ndërmjet të tjerave në botimet dhe artikujt shkencorë në fushën juridike, në produktet profesionale sipas profileve të ushtrimit të profesionit, rezultatet e vlerësimit profesional dhe të etikës të kandidatëve në punët që kanë bërë në të shkuarën, nëse ka, ose rezultatet e dallueshme të arritura gjatë përvojave të tyre të punës e që lidhen me ushtrimin e funksioneve në fushën përkatëse.

36. Prandaj, në zbatim të ligjit, Këshilli i Emërimeve në Drejtësi vlerëson me pikë si sasinë ashtu edhe cilësinë e rezultateve profesionale, me një fokus të veçantë tek cilësia. Në këtë mënyrë, bazuar në të dhënat e mundshme të disponueshme për vlerësim, mbahen parasysh sasia e pikëve maksimale prej 30 pikësh, sipas vendimit nr. 5, datë 02.04.2019 të KED, si edhe orientimet për caktimin e mundshëm të një maksimumi prej 25 pikësh për sa i përket vlerësimit cilësor dhe të një maksimum prej 5 pikësh për vlerësimin e sasisë së rezultateve profesionale sipas Metodologjisë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51, datë 21.06.2019.

37. Në rastin e kandidates Alma Faskaj (Vokopola), Këshilli shqyrtoi dokumente profesionale dhe të dhënat që mund të disponoheshin nga veprimtaria e saj profesionale, si edhe nga kontributet e tjera profesionale të kësaj kandidate në veprimtari të ndryshme, përfshirë publikime apo punime e artikuj shkencorë.

38. Nga aktet që ndodhen në dosjen e kandidimit rezulton se kandidates Alma Faskaj (Vokopola) ka dorëzuar punimet profesionale si më poshtë vijon:

Punime të deklaruara sipas vetë kandidatit në jetëshkrim²:

² Jetëshkrimi është përditësuar në Gusht 2025.

- *“Respektimi i afateve procedurale moment esencial lidhur me transparencën e organeve të administratës publike ndaj individëve palë në një procedim administrativ”*, Konferenca Kombëtare “E drejta e informimit e drejtë themelore e njeriut”, organizuar nga institucioni Avokati i Popullit, Dhjetor 2002; Shtëpia botuese “Luarasi”, Tiranë 2003.
- *“Të dhënat e monitorimit të përmbaruesve gjyqësor”*, monitorim i kryer nga zyra e institucionit të Avokatit të Popullit, të përpunuara nga INSTAT. Konferenca Kombëtare “Të drejtat e punonjësve” të institucionit të Avokatit të Popullit, Dhjetor 2004.
- *“Pjesëmarrja e palëve në procedimin administrativ”*, Tribuna Juridike, Nr. 54, Botimi Fondacionit “Për kulturë juridike”, Tiranë 2003.³ (Nuk është dorëzuar në dosje).
- *“Faza vendimmarrëse në procedimin administrativ”*, Tribuna Juridike nr. 55, Botim i Fondacionit “Për kulturë juridike”, Tiranë 2003;⁴ (Nuk është dorëzuar në dosje).
- *“Pjesëmarrja e fëmijëve dhe legjislacioni shqiptar”*, Revista Jeta Juridike, Botues Shkolla e Magjistraturës, Nëntor 2008.
- *“Disa komente mbi manifestimin e besimit fetar në shkollat tona publike”*, Revista “E drejta parlamentare dhe politikat ligjore”, nr. 44, 2008.
- *“Pjesëmarrja e palëve të interesuara në procedimin administrativ, në këndvështrimin e Kodit të Procedurave Administrative dhe Jurisprudencës së Gjykatës Kushtetuese”*, Referim në Seminarin Shkencor Ndërkombëtar me temë “Për një të drejtë në përmasat e njeriut”, organizuar nga Universiteti i Barit, Fakulteti i Drejtësisë Jopublik “Justicia”, Universiteti European i Tiranës, Prill 2009.⁵ (Nuk është dorëzuar në dosje me emër botuesi, vit botimi etj).
- *“Pjesëmarrja aktive dhe instrumentet e reja në mbrojtje të të drejtave të njeriut”*, Konferenca Shkencore me temë “Pjesëmarrja aktive dhe instrumentet e reja në mbrojtje të drejtave të njeriut”, organizuar nga Universiteti i Barit, Qendra CEDICLO në Martina Franca, Itali, 2009;⁶ (Nuk është dorëzuar në dosje, vetëm broshura e aktivitetit).
- *Bashkautor i Komentarit Elektronik në analizimin dhe komentimin e disa neneve, të katër prej ligjeve të paketës së reformës në drejtësi: Ligji nr. 115/2016 “Për organet e qeverisjes së sistemit të drejtësisë”; Ligji nr. 96/2016 “Për statusin e gjyqtarëve dhe prokurorëve”; Ligji nr. 37/2017 “Kodi i Drejtësisë Penale për të Mitur”; Ligji nr. 7491, datë 29.04.1991, i ndryshuar “Kodi i Procedurës Penale i Republikës së Shqipërisë”*, Koha e botimit 2018.
- *Bashkëautor i Projektit të Kodit të Drejtësisë për të Mitur*, Eksperte e UNICEF, Janar 2016 – Nëntor 2016.
- *“Çështje të të drejtës administrative në vështrim krahasues”*, botim në kuadër të projektit “Mbështetje për forcimin e sistemit gjyqësor shqiptar”, me mbështetjen e Europartners Development dhe me kontributin e Shkollës së Magjistraturës, Viti 2010⁷.

³ Ky punim nuk është dorëzuar në dosje.

⁴ Ky punim nuk është dorëzuar në dosje.

⁵ Për këtë punim ka deklaruar në parashtrime se nuk e disponon. Por në dosje ka një shkrim (pa emër botuesi, vit botimi) në dokument të thjeshtë, me këtë titull.

⁶ Për këtë punim ka dorëzuar broshurën e aktivitetit, ndërsa për botimin deklaroi se nuk i është vënë në dispozicion.

⁷ Vetëdeklaruar në jetëshkrimin e përditësuar në muajin Gusht 2025.

- “*Afati i procedimit administrativ*”, Revista Juridike Shkencore “Jeta Juridike”, Numri 3, Viti XII i Botimit, Tiranë, Shtator 2012, Shkolla e Magjistraturës, Autor Alma Faskaj – Vokopola.⁸

Punime të dorëzuara fizikisht pranë KED:

- “*Pjesëmarrja e palëve të interesuara në procedimin administrativ, në këndvështrimin e Kodit të Procedurave Administrative dhe Jurisprudencës së Gjykatës Kushtetuese*”⁹. Në vijim të njoftimit të KED, kandidati në parashtrimet e dërguara elektronikisht ka deklaruar se nuk e disponon këtë punim (sqarohet se: KED ka kërkuar të dhëna për punimet lidhur me botuesin, vitin e botimit etj), por nga dokumentacioni i paraqitur në kohën e aplikimit, rezulton në një format të thjeshtë (word) një dokument me këtë titull.
- “*Afati i procedimit administrativ*”, Revista Juridike Shkencore “Jeta Juridike”, Numri 3, Viti XII i Botimit, Tiranë, Shtator 2012, Shkolla e Magjistraturës, Autor Alma Faskaj – Vokopola.¹⁰
- “*Disa komente mbi manifestimin e besimit fetar në shkollat tona publike*”.¹¹
- “*Respektimi i afateve procedurale, moment thelbësor për transparencën e organeve të administratës publike ndaj individëve palë në një procedim administrativ*”, Konferenca Kombëtare “E drejta e informimit e drejtë themelore e njeriut”, Botuar nga Avokati i Popullit. Autor Alma Vokopola.
- “*Të dhënat e monitorimit të përmbaruesve gjyqësor*”, Konferenca Kombëtare “Ekzekutimi i vendimeve gjyqësore të formës së prerë në mbrojtje të të drejtave të individëve”, Botuar nga Avokati i Popullit, 2004.
- “*Pjesëmarrja e fëmijëve dhe legjislacioni shqiptar*”, Revista “Jeta Juridike”, Nr. 4, Dhjetor 2008, Botues Shkolla e Magjistraturës, Bashkëautor Alma Faskaj (Vokopola), Elda Kalaja.
- “*Pjesëmarrja e fëmijëve. Legjislacioni shqiptar*”, Revista “Fëmijët sot”, Botim periodik i Qendrës “Fëmijët Sot”, nr. 1, 2008, Bashkëautor Alma Faskaj (Vokopola), Elda Kalaja.¹²
- “*Ndërrhyrjet e Institucionit të Avokatit të Popullit në implementimin e parimit të mirëadministrimit në fushën e arsimit*”, Autor Alma Faskaj (Vokopola).¹³
- “*Procedura administrative*”, botim në Manualin “Çështje të të drejtës administrative në vështrim krahasues”, në kuadër të projektit “Mbështetje për forcimin e sistemit gjyqësor shqiptar”, Financuar nga “Agjensia Spanjolle e Bashkëpunimit Ndërkombëtar për Zhvillim (AECID)”, me mbështetjen e Europartners Development dhe me kontributin e Shkollës së Magjistraturës, Viti 2010, Autor Alma Faskaj (Vokopola). Në këtë manual rezulton edhe një publikim me titull “*Shërbimet publike në Shqipëri*.”

⁸ Vetëdeklaruar në jetëshkrimin e përditësuar në muajin Gusht 2025.

⁹ Punimi i dorëzuar nuk përmban të dhëna për botuesin, vitin e botimit. Por në jetëshkrim është vetëdeklaruar si Referim në Seminarin Shkencor Ndërkombëtar me temë “Për një të drejtë në përmasat e njeriut”, organizuar nga Universiteti i Barit, Fakulteti i Drejtësisë Jopublik “Justicia”, Universiteti European i Tiranës, Prill 2009.

¹⁰ Ky publikim është dorëzuar fizikisht pranë KED, por nuk është referuar në jetëshkrim.

¹¹ Ky publikim është dorëzuar fizikisht pa të dhëna për botuesin, vitin e botimit. Por në jetëshkrim është vetëdeklaruar si botim në Revistën “E drejta parlamentare dhe politikë ligjore”, nr. 44, 2008.

¹² Ky publikim i dorëzuar fizikisht nuk është shënuar në jetëshkrim.

¹³ Ky publikim është dorëzuar fizikisht pa të dhëna për botuesin, vitin e botimit. Nuk është deklaruar në jetëshkrim.

Format e ofrimit të tyre”, bashkëautor Eralda Çani (Methasani), Alma Faskaj – por ky punim nuk është referuar në jetëshkrim.

- Koment i neneve 36, 37, 40, 41, 46, 48, 51, 52 të ligjit nr. 115/2016 “Për organet e qeverisjes së sistemit të drejtësisë” (Ligji për qeverisjen).

Pjesëmarrje në Konferenca Shkencore:

- Prezantime/angazhim në Konferencën Kombëtare “E drejta e informimit e drejtë themelore e njeriut”, organizuar nga institucioni Avokati i Popullit, Dhjetor 2002; Konferencën Kombëtare “Të drejtat e punonjësve” të institucionit të Avokatit të Popullit, Dhjetor 2004; Seminarin Shkencor Ndërkombëtar me temë “Për një të drejtë në përmasat e njeriut”, organizuar nga Universiteti i Barit, Fakulteti i Drejtësisë Jopublik “Justicia”, Universiteti European i Tiranës, Prill 2009; Konferencën Shkencore me temë “Pjesëmarrja aktive dhe instrumentet e reja në mbrojtje të drejtave të njeriut”, organizuar nga Universiteti i Barit, Qendra CEDICLO në Martina Franca, Itali, 2009

5 (pesë) dokumentet e përzgjedhura nga kandidati:

- a) “Çështje të të drejtës administrative në vështrim krahasues”, botim në kuadër të projektit “Mbështetje për forcimin e sistemit gjyqësor shqiptar”, me mbështetjen e Europartners development dhe me kontributin e Shkollës së Magjistraturës, ISBN, 978-99927-685-4-9, viti 2010. Në këtë botim kërkon të merret në konsideratë punimi për të cilin është autore e vetme, “*Procedura Administrative*”.
- b) *Bashkautor i Komentarit Elektronik* në analizimin dhe komentimin e disa neneve të 4 (katër) prej ligjeve të shumta që përbëjnë paketën e reformës: (i) Ligji nr. 115/2016 ‘Për Organet e Qeverisjes së Sistemit të Drejtësisë’; (ii) Ligji nr. 96/2016 ‘Për Statusin e Gjyqtarëve dhe Prokurorëve’; (iii) Ligji nr. 37/2017 ‘Kodi i Drejtësisë Penale për të Mitur’; (iv) Ligji nr. 7491, datë 29 Prill 1991, i ndryshuar ‘Kodi i Procedurës Penale i Republikës së Shqipërisë’, viti 2018.
- c) “*Afati i procedimit Administrativ*”; Revista “Jeta Juridike” nr. 3, Shtator 2012;
- d) *Bashkautor i Projektit të Kodit të Drejtësisë Penale për të Mitur*; Eksperte e UNICEF; Koha e botimit Janar 2016 - Nëntor 2016;
- e) *Vendim nr. 2, datë 18.01.2017, të Gjykatës Kushtetuese*, ku kandidati ka qenë në cilësinë e një prej përfaqësuesve të autorizuar të Kuvendit të Shqipërisë, në çështjen me objekt “*Shfuqizimi si i papajtueshëm me Kushtetutën e Republikës së Shqipërisë i ligjit nr. 84/2016, datë 30.08.2016 “Për rivlerësimin kalimtar të gjyqtarëve dhe prokurorëve në Republikën e Shqipërisë”. Pezullimi i zbatimit të ligjit nr.84/2016, datë 30.08.2016 “Për rivlerësimin kalimtar të gjyqtarëve dhe prokurorëve në Republikën e Shqipërisë”*”. Sipas kandidatit kontributi i saj ka qenë në drejtim të përgatitjes së parashtrimeve pranë Gjykatës Kushtetuese dhe pjesëmarrja aktive në seancën gjyqësore të zhvilluar.¹⁴

39. Po ashtu nga jetëshkrimi i kandidatit Alma Faskaj (Vokopola) rezulton të jetë deklaruar në rubrikën e përvojës profesionale angazhim profesional si: Lektore në trajnimin fillestar dhe

¹⁴ Kandidati Alma Faskaj ka qenë Këshilltar në Shërbimin e Përafrimit të Legjislacionit (Kuvendi), gjatë periudhës 01.04.2014 – 17.06.2017.

vazhdues, Shkolla e Magjistraturës për periudhën 2010 - Maj 2017, ndërkohë sipas informacionit të përcjellë nga Shkolla rezulton angazhim për periudhën e cituar më lart; si dhe Pedagoje e jashtme në Fakultetin e Drejtësisë Jo Publik "Luarasi", "Justizia", "Justiniani", për periudhën Gusht 2004- Maj 2017, ndërkohë që lidhur me këtë angazhim rezulton e provuar sipas dokumentacionit të paraqitur më sipër.

40. Mbështetur në këto të dhëna të rezultateve në ushtrimin e detyrës, si dhe në tematikën e përmbajtjen e produkteve profesionale të lidhura me ushtrimin e detyrës apo edhe me ushtrimin e profesionit, Këshilli vlerëson se *në aspektin sasior* kandidatja Alma Faskaj (Vokopola) ka tregues pozitiv angazhimi profesional, i cili rezulton të jetë mbi atë që mund të gjykohej si një angazhim i zakonshëm apo “mesatar” në ushtrimin e profesionit. Për këto arsye, Këshilli çmoi ta vlerësojë kandidaten Alma Faskaj (Vokopola) për këtë kriter ligjor vlerësimi me **33 Pikë**.

41. Për sa i përket *vlerësimit cilësor*, Këshilli shqyrtoi të dhënat që rezultojnë nga jetëshkrimi dhe dokumentacioni i paraqitur nga vetë kandidatja Alma Faskaj (Vokopola), veçanërisht pesë prej dokumenteve të përzgjedhura prej tij, me synimin për të evidentuar, bazuar në tregues shkencorë, elementë që dëshmojnë arritjen e rezultateve profesionale, shkallën e këtyre arritjeve, përfshirë elementë që nga këto dokumente profesionale dhe në tërësi nga veprimtaria profesionale e kandidatit dëshmojnë spikatjen dhe dallueshmërinë e tij në kuptimin dhe qëllimin për të cilin Kushtetuta dhe ligji e përcakton si kusht për vlerësimin e kandidaturës për këtë Këshill dhe, më tej, për përzgjedhjen e gjyqtarit të Gjykatës Kushtetues nga organet e emërtesës.

42. Në veprimet përgatitore të kryera gjatë procedurave të verifikimit të kandidaturës, kandidatja Alma Faskaj (Vokopola) ka depozituar pranë Këshillit dokumentacionin përkatës për vlerësim dhe ka përzgjedhur pesë dokumente.

43. Në lidhje me tërësinë e dokumenteve profesionale të paraqitura nga kandidatja Alma Faskaj (Vokopola) për realizimin e vlerësimit profesional dhe të pikëzimit përkatës për këtë kriter ligjor vlerësimi, Këshilli shqyrtoi dhe bisedoi në mënyrë të posaçme dhe të kujdesshme përmbajtjen e tyre, duke u mbështetur mbi indikatorë shkencorë, sikurse janë edhe ato të përmendura në Shtojcën nr. 1 të vendimit sipas vendimit nr. 5, datë 02.04.2019 të këtij Këshilli, si edhe orientime që përmbahen në Metodologjinë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51, datë 21.06.2019.

44. Dokumentet profesionale të shqyrtuara trajtojnë tematika të ndryshme që lidhen me: *publikime shkencore në fushën e të drejtës publike dhe atë administrative, në pjesëmarrje aktive për hartim dhe draftim të akteve ligjore jo vetëm në fushën administrative por edhe atë penale, kryesisht me drejtësinë penale për të mitur. Gjithashtu, nga aktet e vëna në dispozicion është treguar performanca e përfaqësimit të institucionit që e ka autorizuar (Kuvendit) për të mbrojtur dispozitat ligjore të ligjit nr. 84/2016, datë 30.08.2016 “Për rivlerësimin kalimtar të gjyqtarëve dhe prokurorëve në Republikën e Shqipërisë”.*

45. Njëri ndër indikatorët vlerësues të dokumenteve profesionale është “*Originaliteti dhe/ose impakti*”, duke marrë në konsideratë faktin se nuk ka të dhëna për plagjiaturë të punimeve të

sipërcituara. Nisur nga profili profesional kryesisht si funksionar publik i cili ka ushtruar funksione publike pranë organeve kushtetuese dhe në nivel qendror, veçanërisht pasur në vëmendje ushtrimin e detyrës së Anëtarit të Komisionit të Pavarur të Kualifikimit një funksion kushtetues i një profili të lartë, lektore e së drejtës për një periudhë të konsiderueshme apo edhe detyrat e tjera që ka ushtruar kandidatja në pozicionin e ndihmëskomisioneres dhe keshilltares së Avokatit të Popullit, apo edhe keshilltarit ligjor në Kuvend, Këshilli vëren se publikimet dhe artikujt e analizuar dëshmojnë qasje profesionale origjinale veçanërisht mbi trajtimin e instituteve që lidhen me të drejtën administrative dhe atë publike, të drejtat procedurale dhe garantimin e të drejtave dhe lirive themelore të njeriut sipas standarteve të Gjykatës Evropiane të të Drejtave të Njeriut. Nga analiza e punimeve të kandidatit evidentohet metodika dhe aftësia për të përcjell mendimin në mënyrë të qartë. Po ashtu punimet profesionale të kandidatit edhe pse janë kryesisht të fokusuara në të drejtën publike dhe atë administrative që kanë të bëjnë me procedurat hetimore dhe sjelljen e organeve publike, nuk janë akte të cilat të kenë sjellë ndonjë impakt në praktikën gjyqësore apo në doktrinën juridike.

46. Për sa i përket treguesit vlerësues të lidhur me “*Aftësitë analitike*”, Këshilli vëren se posaçërisht pesë dokumentet profesionale të shqyrtuara, sikurse edhe në rastin e publikimeve dhe artikujve profesionalë, kandidatja Alma Faskaj (Vokopola) tregon zotërimin e aftësive analitike për të analizuar informacionin dhe për të identifikuar, arsyetuar dhe zbatuar konceptet ligjore, parimet dhe institutet e së drejtës, sipas natyrës dhe qëllimit të vetë këtyre punimeve. Punimet e depozituara nga kandidatja si pjesë e punimeve më të dalluara të saj, shfaqin korrektesën formale dhe qartësinë e strukturës, për mënyrën origjinale të trajtimit të çështjeve komplekse. Kandidatja ka depozituar punime shkencore që tregojnë se ajo ka aftësi profesionale dhe kuptim gjithëpërfshirës të të drejtës në tërësi dhe të drejtës publike dhe asaj administrative në veçanti. Gjithashtu, punimi i përzgjedhur nga kandidatja për mbrojtjen para gjykatës kushtetuese të dispozitave ligjore të ligjit nr. 84/2016, datë 30.08.2016 “Për rivlerësimin kalimtar të gjyqtarëve dhe prokurorëve në Republikën e Shqipërisë”, tregon qartësisht kuptim e drejtë që ka kandidatja ndaj gjykimit kushtetues, si adresohen çështjet para gjykatës dhe paraqitjes së mendimit juridik në lidhje me to.

47. Në lidhje me treguesin vlerësues “*Aftësitë kërkimore*”, Këshilli shqyrtoi dokumentet profesionale të përzgjedhura nga kandidatja Alma Faskaj (Vokopola), sikurse edhe publikimet dhe artikujt profesionalë, të paraqitur në dosjen e kandidates. Nga ky shqyrtim, Këshilli vëren se këto punime përmbajnë informacione të lidhura kryesisht me të drejtën publike dhe atë administrative në drejtim të hetimit dhe shqyrtimit administrativ, por nuk mungojnë edhe fusha të tjera të së drejtës si ajo në lëmin penal që ka lidhje me drejtësinë penale për të mitur, apo edhe me komente rreth manifestimit të besimit fetar në shkollë, e cila, përbën një çështje të ndjeshme në vendet e Europës. Për arritjen e lëndës së trajtuar dhe qëllimin e trajtimit shkencor, nga përmbajtja e secilit prej punimeve të shqyrtuara, adresohen analiza krahasimore duke përdorur burime të ndryshme të doktrinës dhe praktikës gjyqësore, vendase dhe ndërkombëtare. Vërehet gjithashtu, se në draftimin e këtyre botimeve kandidatja më shumë është fokusuar për të dhënë mendimin e saj analitik origjinal, sesa përdorimin e burimeve kërkimore apo citimeve të tyre.

48. Për treguesit “*Saktësia dhe precizoni*”, në thelb, u verifikua nëse në veprimtarinë profesionale të kandidatës janë mbuluar me profesionalizëm tematika e përzgjedhur dhe materiali ka shmangur përsëritjet apo citimet e panevojshme etj. Nga shqyrtimi i dokumenteve profesionale të përzgjedhura nga kandidatja Alma Faskaj (Vokopola), Këshilli vëren se këto punime tregojnë nivel të kënaqshëm të parashtrimit të problemeve juridike për analizë dhe zgjidhje, përdorim korrekt të terminologjisë juridike dhe të gjetjeve nga legjislacioni, doktrina, si edhe praktika gjyqësore.

49. Në lidhje me treguesin vlerësues “*Qartësia*”, Këshilli shqyrtoi dokumentet profesionale të përzgjedhura nga kandidatja Alma Faskaj (Vokopola), sikurse edhe publikimet dhe artikujt profesionalë të paraqitur në dosjen e kandidatës. Këshilli vëren se këto punime janë të organizuara dhe strukturuara në mënyrën e duhur, gjuha e përdorur është profesionale dhe e kujdesshme nga pikëpamja etike. Qartësia e gjuhës së përdorur dhe strukturimi i materialit i bëjnë këto punime të kuptueshme dhe të lexueshme, sipas natyrës së punimit dhe grupeve të interesit të cilave synon ti drejtohet.

50. Këshilli, pasi shqyrtoi të dhënat që rezultojnë nga jetëshkrimi dhe dokumentacioni i paraqitur nga vetë kandidatës Alma Faskaj (Vokopola) për sa i përket **vlerësimit cilësor**, vjen në përfundimin se kandidatja Alma Faskaj (Vokopola) vlerësohet në total me **144,5 Pikë**.

C. Meritat profesionale – Kualifikimi Shtesë Profesional

51. Në shkronjën “b” të pikës 2 dhe shkronjën “b” të pikës 3 të nenit 7/a të ligjit nr. 8577/2000, në shkronjën “b” të pikës 1 të nenit 240 të ligjit nr. 115/2016, si edhe në vendimin nr. 5 datë 02.04.2019 të Këshillit të Emërimeve në Drejtësi të nxjerrë në bazë e për zbatim të ligjit, në lidhje me kualifikimin e shtesë profesional, përcaktohen si kritere vlerësimi që kandidatët të kenë veprimtari të njohur në fushën e të drejtës kushtetuese, të drejtave të njeriut dhe në sfera të tjera të së drejtës, vlerësim të dallueshëm të rëndësisë së punimeve akademike, studimeve shkencore, shkrimeve dhe ligjëratave profesionale, botimeve, si dhe pjesëmarrjen në aktivitete shkencore, përvojë të veçantë në një fushë të caktuar të së drejtës, si edhe pjesëmarrje të dallueshme në procesin e hartimit ose të konsultimit të legjislacionit dhe çdo angazhim tjetër profesional të kandidatit përgjatë 5 viteve të fundit në fushën e së drejtës.

52. Prandaj, në zbatim të ligjit, në varësi edhe të profileve dhe karrierave profesionale të secilit kandidat, nga totali prej 12 pikësh për këtë kategori vlerësimi, Këshilli i Emërimeve në Drejtësi vlerëson deri në 8 pikë ekspertizën në të drejtën kushtetuese dhe në të drejtat e njeriut ose ekspertizën në fusha të tjera të veçanta të së drejtës. Gjithashtu, Këshilli vlerëson deri në 4 pikë angazhimet profesionale shtesë të kandidatëve. Në arsyetimin dhe përfundimet e tij Këshilli mban parasysh rregullat e hollësishme të përcaktuara me vendimin normativ nr. 5 datë 02.04.2019 të këtij Këshilli, si edhe orientimet në përcaktimin e pikëve përkatëse të merituar sipas Metodologjisë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51, datë 21.06.2019.

Specializimi në të drejtën kushtetuese, të drejtat e njeriut ose në fusha të tjera të së drejtës

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

53. Për sa i përket kriterit të parë vlerësues, *ekspertizës në të drejtën kushtetuese dhe në të drejtat e njeriut ose ekspertizës në fusha të tjera të veçanta të së drejtës*, nisur nga të dhënat që rezultojnë nga jetëshkrimi, motivimi për kandidim, intervista dhe dokumente të tjera zyrtare mbi rezultate të vlerësimit profesional etj., si edhe nga shqyrtimi i dokumenteve profesionale të paraqitura nga kandidatja Alma Faskaj (Vokopola), Këshilli i rezulton se karriera profesionale e këtij kandidati është fokusuar në profilin e një zyrtari që ka ushtruar funksione të larta shtetërore dhe disa prej tyre kanë peshën e funksioneve kushtetuese. Spikat përvoja e veçantë e kandidatit në fusha të caktuara të së drejtës siç është ajo e gjyqtarës, Komisioneres pranë Komisionit të Pavarur të Kualifikimit, si dhe këshilltarit ligjor në Kuvend. Nga analiza e punimeve të përcjella nga kandidatës, realizuar gjatë karrierës së saj profesionale evidentohet se kandidatja është e specializuar në fushën publike dhe administrative, por nuk evidentohen specializime të mirëfillta në fushën e gjyqimit kushtetues.

54. Si rrjedhojë dhe reflektim i përgatitjes profesionale dhe përvojës së fituar, kandidatja Alma Faskaj (Vokopola) në cilësinë e autores ka realizuar shumë punime profesionale dhe artikuj shkencor, të cilat, në pjesën më të madhe të tyre, trajtojnë aspekte të ndryshme të së drejtës, veçanërisht lidhur me aplikimin praktik të parimeve të hetimit dhe veprimtarisë administrative.

55. Prandaj, në lidhje me kriterin vlerësues të “*ekspertizës në të drejtën kushtetuese dhe në të drejtat e njeriut ose në fusha të tjera të së drejtës*” Këshilli vlerëson t’i caktojë kandidatës Alma Faskaj (Vokopola) **48 Pikë**.

Angazhime profesionale shitesë

56. **Shkolla e Magjistraturës** ka bërë me dije KED se, kandidatja Alma Faskaj (Vokopola) ka marrë pjesë në rolin e ekspertit apo lehtësuesit në aktivitetet trajnuese, si vijon:

- Aktivitetit trajnues me temë “*Zbatimi i drejtpërdrejtë i Konventës për eliminimin e të gjitha formave të diskriminimit ndaj grave (CEDAË). Roli i gjykatës dhe i sistemit të drejtësisë*”, datë 24 - 25 tetor 2016, në rolin “Lehtësuese”;
- Aktivitetit trajnues me temë “*Kuadri ligjor mbi të drejtat e grupeve të marginalizuara me fokus tek gratë dhe vajzat. Konventa e Stambollit mbi dhunën në familje dhe roli i sistemit të drejtësisë.*”, datë 31 tetor 2016 - 1 nëntor 2016, në rolin “Ekspertes”;
- Aktivitetit trajnues me temë “*Risitë që sjell Kodi i ri i Procedurave Administrative në krahësim me Kodin e mëparshëm. Ligjshmëria e aktit administrativ; paligjshmëria dhe pavlefshmëria absolute; Mjetet e ankimit dhe të rishikimit të akteve administrative; Ankimi administrativ; kundërshtimi dhe rishikimi; Anulimi dhe shfuqizimi. Elementët e përbashkët dhe të veçantë të gjyqimit administrativ dhe kushtetues.*”, datë 2-3 shkurt 2017, në rolin “Eksperte”.
- Aktivitetit trajnues me temë “*Dimensioni i ri i aksesit dhe bashkëpunimit të individit me institucionet e drejtësisë. Gjykimi kushtetuese i kërkesave individuale dhe shqyrtimi i informacioneve dhe kërkesave të qytetarëve nga organet e pushtetit gjyqësor.*”, datë 6-7 korrik 2017, në rolin “Eksperte”.

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

56.1. Nga aktet e dosjes dhe nga vetëdeklarimet e kandidatit Alma Faskaj (Vokopola), rezulton se kandidati ka pasur edhe *këto angazhime shtesë profesionale*¹⁵, si më poshtë:

- Pedagoge me kohë të pjesshme, në cilësinë e asistent-pedagoges, në Departamentin e së Drejtës Publike, pranë Fakultetit të Drejtësisë, Universiteti i Tiranës në vitin akademik 2002-2003 në zhvillimin e seminareve të lëndës "E Drejtë Administrative", në vitin akademik 2003-2004, në vitin akademik 2004-2005 në zhvillimin e seminareve të lëndës "E Drejtë Administrative", në semestrin e dytë të vitit akademik 2009-2010 në zhvillimin e leksioneve të lëndës "E Drejtë Administrative" dhe në semestrin e dytë të vitit akademik 2016-2017 në zhvillimin e seminareve të lëndës "E Drejtë Administrative", sipas informacionit të përcjellë nga Universiteti i Tiranës, Fakulteti i Drejtësisë, me shkresën nr. 185/1 Prot., datë 21.02.2025, pranë KED.
- Pedagoge e jashtme në Fakultetin e Drejtësisë pranë Kolegjit Universitar "Luarasi" nga viti 2004 deri në vitin 2012, në lëndën "E drejta Administrative", sipas vërtetimit të lëshuar nga Kolegji Universitar "Luarasi", datë 8.2.2017,
- Lektore në lëndët "E drejta administrative" dhe "E drejta administrative Studime të Thelluara" për periudhën kohore 1.10.2007-30.07.2012 në Shkollën e Lartë Universitare Jopublike "Justicia", Fakulteti i Drejtësisë, sipas vërtetimit të lëshuar nga Shkolla e Lartë Universitare Jopublike "Justicia", datë 06.02.2017;
- Pedagoge e jashtme në Universitetin "Marin Barleti", Departamenti i Drejtësisë, për lëndën "E drejtë Administrative", në vitin akademik 2009-2010, sipas vërtetimit të lëshuar nga Universiteti "Marin Barleti", datë 21.10.2019,
- Konsulente në hartimin/draftimin e Kodit të Drejtësisë Penale për të Mitur, sipas kontratës së lidhur me UNICEF, në datë 4.4.2016.¹⁶
- Eksperte për komentimin dhe rishikimin e komenteve të kryera nga autorë të tjerë të dispozitave të disa ligjeve që i përkasin paketës ligjore në kuadër të Reformës në Drejtësi, viti 2017 (Euralius).
- Angazhim dhe kontribut aktiv në hartimin e paketës ligjore për reformimin e sistemit të Drejtësisë në Shqipëri si pjesë e Sekretariatit Teknik pranë Grupit të Ekspertëve të Nivelit të Lartë, angazhuar në periudhën 2015-2016, sipas Certifikatës së lëshuar nga Komisioni i Posaçëm Parlamentar për Reformën në Sistemin e Drejtësisë në datë 1.02.2017,
- Nga data 06.03.2025 rezulton anëtare e Këshillit të Administrimit të shoqërisë "ALBTrace Co" sha, regjistruar në datë 12.03.2025,

57. Këto angazhime shtesë profesionale janë të lidhura me kontribute dhe pjesëmarrje në përgatitjen e analizave ligjore dhe studimeve mbi çështje të ndryshme të legjislacionit në fusha të ndryshme të së drejtës. Pavarësisht angazhimit të kandidatës në fushën e mësimdhënies por edhe shkrimit dhe publikimit të artikujve shkencorë, nuk rezulton që ato të kenë një impakt të tillë specifik në doktrinën juridike dhe praktikën gjyqësore, duke ndikuar që të vlerësohet me pikë maksimale.

¹⁵ Të cilat pjesërisht janë referuar nga kandidati në kategorinë e publikimeve.

¹⁶ Lidhur me këtë angazhim kandidati ka dorëzuar Projektligjin e Kodit të Drejtësisë Penale për të Mitur, si dhe kontratën e lidhur për shërbimin me UNICEF.

58. Prandaj, duke pasur parasysh këto angazhime shtesë profesionale, të shtrira në kohë dhe me kontribute konkrete profesionale në disa nga fushat më të rëndësishme të së drejtës, Këshilli vlerëson që për kriterin vlerësues të “*angazhimeve profesionale shtesë*”, t’i caktojë kandidates Alma Faskaj (Vokopola) **30 Pikë**.

Meritat Morale

59. Në shkronjën “c” të pikës 2 të nenit 7/a të ligjit nr. 8577/2000 si kriter vlerësimi është përcaktuar që kandidatët të jenë vlerësuar për “*integritetin etik e moral*”. Po kështu, në shkronjën “a” të pikës 1 të nenit 240 të ligjit nr. 115/2016 përcaktohen si kriter “*Rezultatet e vlerësimit të etikës së kandidatëve gjatë punës, nëse ka*”, ndërsa në shkronjat “a” dhe “b” të pikës 2 të këtij neni përcaktohen si kriter vlerësimi edhe “*Reputacioni që gëzon kandidati në shoqëri dhe midis kolegëve*” dhe “*cilësitë morale, të tilla si ndershmëria, përpikëria në ushtrimin e detyrave, drejtësia në marrjen e vendimeve, përgjegjshmëria, besueshmëria, paanësia, dinjiteti dhe prirja për të marrë përsipër përgjegjësi*”. Së fundi, në shkronjën “c” parashikohet si kriter vlerësimi edhe “*angazhimi i provuar në ndjekje të kauzave të shoqërisë civile*”. Në bazë dhe për zbatim të ligjit, lidhur me këto kriter vlerësimi, Këshilli i Emërimeve në Drejtësi ka nxjerrë vendimin normativ nr. 5, datë 02.04.2019 ku përcaktohen rregullime më të hollësishme si edhe shpërndarja e pikëve të vlerësimit sipas peshës specifike të këtyre kriterëve.

60. Prandaj, në zbatim të ligjit, lidhur me meritat morale, nga totali prej 30 pikësh për të tre komponentët vlerësues, Këshilli i Emërimeve në Drejtësi vlerëson deri në 18 pikë *integritetin etik dhe moral*, deri në 10 pikë *reputacionin që gëzon kandidati në shoqëri dhe midis kolegëve* dhe deri në 2 pikë *angazhimin e provuar në ndjekje të kauzave të shoqërisë civile*. Në arsyetimin dhe përfundimet e tij Këshilli mban parasysh rregullat e hollësishme të përcaktuara me vendimin normativ nr. 5, datë 02.04.2019 të këtij Këshilli dhe Shtojcën nr. 1 të tij, si edhe orientimet në përcaktimin e pikëve përkatëse të merituar sipas Metodologjisë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51, datë 21.06.2019.

61. Në lidhje me “*meritat morale*”, krahas të dhënave që rezultojnë nga jetëshkrimi, mbahen parasysh edhe gjetjet në procedurën e verifikimit të kandidatit, ku përmbahen të dhëna që kanë të bëjnë apo mund të përdoren për efekte të vlerësimit të integritetit etik e moral të kandidatit, angazhime në kauza të shoqërisë civile etj. Gjithashtu, për këtë komponent të vlerësimit mbahen parasysh edhe të dhëna e përfundime që mund të nxirren gjatë intervistës së kandidatit me Këshillin e Emërimeve në Drejtësi.

62. Në lidhje me “*vlerësimin e punës*”, pranë Këshillit të Emërimeve në Drejtësi, nga ana e kandidatit janë dorëzuar vlerësimet të realizuara nga punëdhënësit. Kështu, sillet në vëmendje marrëdhënia e punësimit të kandidatit pranë Avokatit të Popullit, si Ndihmëskomisioner dhe Këshilltar, ku institucioni i Avokati i Popullit me shkresën nr. 142/1 Prot., datë 28.02.2025, ka paraqitur pranë KED, dokumentacion lidhur me vlerësimet në punë, nga të cilat në mënyrë të përmbledhur rezulton se:

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

- Vlerësim pune për vitin 2008 ku në përfundim thuhet se, “Sa më sipër, si epror direkt i saj vlerësoj maksimalisht, përveç aftësisë profesionale, edhe aftësitë krijuese, teknike, vetëorganizuese dhe njerëzore që zj. Faskaj manifeston me sjelljen e saj korrekte në ambientin e punës, pa harruar edhe mangësitë që duhet të eliminohen në vitin pasardhës.”;
- Vlerësim pune për vitin 2009 ku në përfundim thuhet se, “Sa më sipër, si epror direkt i saj vlerësoj maksimalisht, përveç aftësisë profesionale, edhe aftësitë krijuese, teknike, vetëorganizuese dhe njerëzore që zj. Faskaj manifeston me sjelljen e saj korrekte në ambientin e punës, pa harruar edhe mangësitë që duhet të eliminohen në vitin pasardhës, me një kërkesë llogarie edhe me të madhe nga ana ime. Nëse do të konsideroni ndonjë shpërblim për fundin e vitit, padyshim do të propozoja atë maksimal.”

62.1 Lidhur me marrëdhënien e punësimit të kandidatit pranë Kuvendit të Republikës së Shqipërisë si Këshilltar në Shërbimin e Përafrimit të Legjislacionit, me shkresën nr. 610/1 Prot., datë 19.02.2025, **Kuvendi**, ndër të tjera, ka dorëzuar pranë KED, dokumentacion për vlerësim në punë, nga të cilat në mënyrë të përmbledhur rezulton se:

- Vlerësime pune nga Kuvendi i Republikës së Shqipërisë, ku është vlerësuar “Shumë mirë” (me përjashtim të periudhës 27.03.2014 - 26.03.2015 ku nuk ka shënim/vlerësim);

63. Në rastin e kandidates Alma Faskaj (Vokopola), krahas jetëshkrimit, paraqitjes dhe sjelljes gjatë parashtrimeve në intervistë, motivimit për kandidim dhe historikut të komunikimit të kandidatit me Këshillin gjatë procesit të verifikimit dhe vlerësimit të kandidaturës, Këshilli i Emërimeve në Drejtësi shqyrtoi të dhënat nga dokumentet profesionale, aktet e tjera zyrtare të administruara në dosjen e kandidatit, si edhe çdo të dhënë a dokument tjetër të aksesueshëm publikisht nëpërmjet të cilave mund të nxirreshin elementë të dobishëm për qëllimet e verifikimit dhe vlerësimit të meritave morale të këtij kandidati.

Integriteti etik e moral

64. Për sa i përket kriterit të parë vlerësues, *integritetit etik e moral*, nisur nga të dhënat që rezultojnë nga jetëshkrimi, motivimi për kandidim, intervista, komunikimi i kandidatit me Këshillin gjatë procedurave të verifikimit dhe vlerësimit, si edhe nga të dhëna të tjera të disponueshme, përfshi ecurinë e karrierës në institucione kushtetuese, Këshilli i rezulton se kandidatja Alma Faskaj (Vokopola) në veprimtarinë, sjelljen dhe komunikimin e saj tregon angazhim të ndërgjegjshëm në përmbushjen e detyrave profesionale dhe në ushtrimin e profesionit, si edhe vëmendje për t’iu përgjigjur me kujdesin e duhur pyetjet të cilat i drejtohen nga bashkëbiseduesit.

65. Prandaj, në lidhje me kriterin vlerësues të “*integritetit etik e moral*” Këshilli vlerëson ti caktojë kandidates Alma Faskaj (Vokopola) **161 Pikë**.

Reputacionin që gëzon kandidati në shoqëri dhe midis kolegëve

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

66. Për sa i përket kriterit të dytë vlerësues “*reputacioni që gëzon kandidati në shoqëri dhe midis kolegëve*”, nisur nga të dhënat që rezultojnë nga jetëshkrimi, motivimi për kandidim, intervista, komunikimi i kandidatit me Këshillin gjatë procedurave të verifikimit dhe vlerësimit, si edhe nga dokumente të tjera zyrtare apo të aksesueshme publikisht, Këshillit i rezulton se kandidatja Alma Faskaj (Vokopola) gëzon reputacion pozitiv mes kolegësh dhe në shoqëri. Kandidatja gëzon reputacion si jurist i mirë dhe karriere në institucione të larta, po ashtu është i mirënjohur në komunitetin profesional për punë korrekte dhe ka shfaqur angazhim publik institucional.

67. Prandaj, në lidhje me kriterin vlerësues të “*reputacioni që gëzon kandidati në shoqëri dhe midis kolegëve*” Këshilli vlerëson ti caktojë kandidates Alma Faskaj (Vokopola) **73 Pikë**.

Angazhimi i provuar në ndjekje të kauzave të shoqërisë civile

68. Për sa i përket kriterit të dytë vlerësues “*angazhimi i provuar në ndjekje të kauzave të shoqërisë civile*”, nisur nga të dhënat që rezultojnë nga jetëshkrimi, motivimi për kandidim, intervista, komunikimi i kandidatit me Këshillin gjatë procedurave të verifikimit dhe vlerësimit, si edhe nga dokumente të tjera zyrtare apo të aksesueshme publikisht, Këshillit i rezulton se, kandidatja Alma Faskaj (Vokopola) ka kontribut në kauzat e shoqërisë civile dhe ajo lidhet kryesisht me ushtrimin e detyrave që ajo ka mbajtur pranë Avokatit të Popullit. Ka rezultuar se kandidatja është angazhuar si eksperte për të drejtat e fëmijëve, por ky angazhim është sporadik dhe jo i vazhdueshëm.

68.1 Prandaj, në lidhje me kriterin vlerësues “*angazhimi i provuar në ndjekje të kauzave të shoqërisë civile*” Këshilli vlerëson kandidaten Alma Faskaj (Vokopola) me **5 Pikë**.

Meritat organizative, drejtuese dhe menaxheriale

69. Në nenin 240 të ligjit nr. 115/2016 parashikohen si kritere vlerësimi disa komponentë të lidhura me aftësitë profesionale dhe personale të kandidatëve mbi çështjet e natyrës drejtuese, organizative, të kapacitetit për vendimmarrje, punës në grup, të komunikimit dhe përfaqësimit publik. Kështu, në pikën 3 të këtij neni parashikohen kriteret vlerësuese për kandidatët si më poshtë:

- “a) cilësinë e platformës dhe të vizionit që paraqesin”;*
- b) aftësitë e provuara për të marrë vendime dhe përgjegjësi bazuar në përvojat e mëparshme profesionale dhe shoqërore;*
- c) aftësitë e komunikimit;*
- ç) aftësitë e të punuarit në grup dhe në ambiente multidisiplinore ose multikulturore;*
- d) aftësitë e përfaqësimit publik”.*

70. Në bazë dhe për zbatim të ligjit, lidhur me këto kritere vlerësimi, Këshilli i Emërimeve në Drejtësi ka nxjerrë vendimin normativ nr. 5, datë 02.04.2019 ku përcaktohen rregullime më të hollësishme si edhe shpërndarja e pikëve të vlerësimit sipas peshës specifike të këtyre kriterëve.

71. Prandaj, në zbatim të ligjit, lidhur me meritat organizative, drejtuese dhe menaxheriale, nga totali prej 10 pikësh për të pesë komponentët vlerësues të sipërcituar, Këshilli i Emërimeve

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

në Drejtësi vlerëson deri në 3 pikë *cilësinë e platformës dhe të vizionit që paraqesin* kandidatët, deri në 4 pikë *aftësitë e provuara për të marrë vendime dhe përgjegjësi bazuar në përvojat e mëparshme profesionale dhe shoqërore*, deri në 2 pikë *aftësitë e komunikimit dhe aftësitë e përfaqësimit publik*, si edhe me 1 pikë për *aftësitë e të punuarit në grup dhe në ambiente multidisiplinore ose multikulturore*. Në arsyetimin dhe përfundimet e tij, Këshilli mban parasysh rregullat e hollësishme të përcaktuara me vendimin normativ nr. 5, datë 02.04.2019 të këtij Këshilli dhe Shtojcën nr. 1 të tij, si edhe orientimet në përcaktimin e pikëve përkatëse të merituar sipas Metodologjisë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51, datë 21.06.2019.

72. Në rastin e kandidates Alma Faskaj (Vokopola) krahas jetëshkrimit, paraqitjes dhe sjelljes gjatë parashtrimeve dhe bisedës në intervistë, përmbajtjes së motivimit për kandidim dhe historikut të komunikimit të kandidatit me Këshillin gjatë procesit të verifikimit dhe vlerësimit të kandidaturës, Këshilli i Emërimeve në Drejtësi shqyrtoi të dhënat nga dokumentet profesionale, aktet e tjera zyrtare të administruara në dosjen e kandidatit, si edhe çdo të dhënë a dokument tjetër të aksesueshëm publikisht nëpërmjet të cilave mund të nxirreshin elementë të dobishëm për qëllimet e verifikimit dhe vlerësimit të meritave organizative, drejtuese dhe menaxheriale të këtij kandidati.

Cilësia e platformës dhe të vizionit

73. Këshilli shqyrtoi përmbajtjen e dokumentit me shkrim, platformës mbi motivimin e kandidimit dhe vizionit të kandidates Alma Faskaj (Vokopola) lidhur me qasjen dhe qëndrimet e tij mbi rëndësinë dhe aspektet thelbësore të ushtrimit të detyrës së gjyqtarit të Gjykatës Kushtetuese, mbi sfidat kryesore me të cilat është përballur dhe duhet të përballlet Gjykata Kushtetuese në ushtrimin e përgjegjësve dhe kompetencave që i ngarkon Kushtetuta dhe ligji. Gjithashtu, në vlerësimin e këtij kriteri, Këshilli mban parasysh edhe parashtrimet dhe shpjegimet e dhëna nga ky kandidat gjatë intervistës dhe në përgjigje të pyetjeve që iu drejtuan nga anëtarët e Këshillit.

74. Nisur nga dokumenti me shkrim dhe shpjegimet e paraqitura gjatë intervistës, Këshilli vëren se kandidates Alma Faskaj (Vokopola) ka njohuritë mbi rëndësinë e misionit, kërkesave etike morale dhe profesionale që dikton pozicioni i gjyqtarit të Gjykatës Kushtetuese si edhe të kësaj Gjykate, në respektimin e lirive themelore dhe të drejtave të njeriut dhe në tërësi të mirëfunksionimit të sistemit demokratik dhe shtetit ligjor. Gjithashtu, kjo kandidate parashtrroi optikën e saj për disa ceshtje në përmbushjen e misionit të Gjykatës Kushtetuese, përmes një platforme të strukturuar me fokusin mbi rolin e Gjykatës Kushtetuese dhe integrimin në BE.

75. Prandaj, në lidhje me kriterin vlerësues “*cilësia e platformës dhe të vizionit të paraqitur*” Këshilli vlerësoi t’i caktojë kandidates Alma Faskaj (Vokopola) **23.5 Pikë**.

Aftësitë e provuara për të marrë vendime dhe përgjegjësi bazuar në përvojat e mëparshme profesionale dhe shoqërore

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

76. Lidhur me aftësitë e provuara për të marrë vendime dhe përgjegjësi, Këshilli mbështetet pikësepari në të dhënat që lidhen me përvoja konkrete nga karriera e kandidatëve në funksione dhe pozicione të cilat kërkojnë dhe tregojnë marrjen përsipër të përgjegjësi dhe ushtrimin e vendimmarrjes në ushtrimin e kompetencave dhe përmbushjen e detyrave të ngarkuara. Gjithashtu, në vlerësimin e kandidatëve për këtë komponent vlerësimi, Këshilli mban parasysh se ushtrimi i çdo detyre, funksioni dhe veprimtarie profesionale, edhe kur formalisht nuk lidhet drejtpërdrejt me të drejtën/detyrimin për ushtrimin e kompetencës vendimmarrëse, gjithsesi përmban elementë që tregojnë aftësi të provuara ose premtuese për të marrë nisma, për të kërkuar zgjidhje, për të marrë përgjegjësi si edhe vendimet e duhura e në kohën e duhur sipas përcaktimeve të ligjit dhe në përgjigje të ndjeshmërisë së publikut.

77. Në rastin e kandidates Alma Faskaj (Vokopola), krahas jetëshkrimit, parashtrimeve dhe bisedës në intervistë, përmbajtjes së platformës dhe motivimit për kandidim, Këshilli i Emërimeve në Drejtësi shqyrtoi të dhënat nga dokumentet profesionale, si edhe aktet e tjera zyrtare të administruara në dosjen e kandidatit, për të evidentuar të dhëna në lidhje me aftësitë e provuara apo premtuese të këtij kandidati për të marrë vendime dhe përgjegjësi edhe në ushtrimin e funksionit të gjyqtarit të Gjykatës Kushtetuese. Këshilli evidenton se kandidatja ka ushtruar funksione publike, të cilat shfaqin nevojën për vendimmarrje sikundër kanë qenë vendimet e marra në cilësinë e gjyqtarës dhe asaj si Komisionere pranë Komisionit të Pavarur të Kualifikimit.

78. Këshilli evidenton se për të vlerësuar aftësinë vendimmarrëse të kandidates Alma Faskaj (Vokopola), Këshilli i referohet kryesisht periudhës kohore që ajo ka ushtruar detyrën funksionale si Komisionere pranë Komisionit të Pavarur të Kualifikimit, gjatë të cilës, vendimmarrja ka qenë kryesisht në mënyrë kolegjiale dhe aftësitë e kandidates janë matur në ato çështje që ajo ka pasur cilësinë e relatores. Nuk ka të dhëna burimore të mjaftueshme, për të vlerësuar raste kur kandidatja ka mbajtur qëndrime në pakicë për të identifikuar dhe vlerësuar cilësitë e saj vendimmarrëse me maksimum pikësh. Megjithatë, nuk është evidentuar që qëndrimi i mbajtur në vendimmarrjet e kandidates të kenë pasur ndonjë impakt të ndjeshëm në praktikën gjyqësore apo të kenë qenë indicie për krijimin e një praktike të qëndrueshme nga Kolegji i Posaçëm i Kualifikimit. Prandaj, në lidhje me kriterin vlerësues “*aftësitë e provuara për të marrë vendime dhe përgjegjësi bazuar në përvojat e mëparshme profesionale dhe shoqërore*”, Këshilli vlerëson t’i caktojë kandidates Alma Faskaj (Vokopola) **26 Pikë**.

Aftësitë e komunikimit dhe aftësitë e përfaqësimit publik

79. Aftësitë e komunikimit, në të gjitha format, sikurse edhe në përfaqësimin publik e me të tretët, të shprehurit në mënyrë të qartë, lehtësisht të kuptueshme, të matur, me respekt dhe në mënyrë jodiskriminuese, luajnë një rol të rëndësishëm në kryerjen e funksionit të gjyqtarit të Gjykatës Kushtetuese.

80. Nga shqyrtimi i jetëshkrimit, mënyra dhe stili i parashtrimeve me shkrim të platformës, sjellja, mënyra e komunikimit dhe argumentimit gjatë bisedës në intervistë, si edhe nga përmbajtja, strukturimi dhe stili i hartimit të dokumenteve profesionale të administruara në dosjen e kandidatit, Këshilli vëren se kandidatja Alma Faskaj (Vokopola) zotëron aftësi të mira

për të komunikuar me kujdesin e duhur, për të dëgjuar me profesionalizëm dhe për tu përgjigjur në lidhje me të gjitha çështjet dhe problematikat që vlerëson të trajtohen, ashtu edhe për çështje dhe problematika që ngrihen nga të tjerët. Prezantimi publik i kandidatit është preciz, korrekt dhe shfaq prezencë institucionale.

81. Prandaj, në lidhje me kriterin vlerësues të “*Aftësitë e komunikimit dhe aftësitë e përfaqësimit publik*”, Këshilli vlerëson ti caktojë kandidates Alma Faskaj (Vokopola) **14.5 Pikë**.

Aftësitë e të punuarit në grup dhe në ambiente multidisiplinore ose multikulturore

82. Gjyqtari i Gjykatës Kushtetuese, për vetë natyrën e këtij funksioni, mënyrës së funksionimit dhe kolegjalitetit të kërkuar në veprimtarinë e vendimmarrjen kësaj Gjykate, duhet të zotërojë aftësitë e duhura për një qasje metodike ndaj punës, si dhe aftësinë për të qenë i përfshirë në punën në grup, me gjyqtarët e tjerë, këshilltarët dhe anëtarët e stafit të Gjykatës. Pjesë e kësaj aftësie është edhe nevoja për t’u përshtatur shpejt me zhvillimet e reja, si edhe ndaj nevojës për t’u përfshirë në veprimtari në ambiente multikulturore dhe multidisiplinore gjatë karrierës gjyqësore.

83. Nga shqyrtimi i jetëshkrimit, sjellja, mënyra e komunikimit dhe argumentimit gjatë bisedës në intervistë, si edhe nga dokumentet profesionale të administruara në dosjen e kandidatit, Këshilli vëren se kandidatja Alma Faskaj (Vokopola) zotëron aftësi shumë të mira për të punuar në grup dhe ka të dhëna të qarta në drejtim të organizimit të veprimtarive në ambiente multikulturore dhe multidisiplinore. Prezantimi dhe dokumentet profesionale dëshmojnë se ky kandidat është përfshirë në vijimësi në projekte profesionale me kolegë të tjerë, vendas apo të huaj, për realizimin e veprimtarive, publikimeve shkencore dhe artikujve profesionalë. Një vlerë e shtuar në këtë kuadër është edhe përvoja e saj si Komisionere pranë Komisionit të Pavarur të Kualifikimit, ku ajo ka punuar e ndarë në kolegje të ndryshme sipas shortimit dhe rregullores së brendshme për veprimtarinë e Komisionit të Pavarur të Kualifikimit.

84. Prandaj, në lidhje me kriterin vlerësues “*Aftësitë e të punuarit në grup dhe në ambiente multidisiplinore ose multikulturore*”, Këshilli vlerëson ti caktojë kandidates Alma Faskaj (Vokopola) **9 Pikë**.

85. Në përfundim të arsytimit mbi mënyrën dhe shkallën e vlerësimit për të gjitha kriteret ligjore të parashikuara nga ligji dhe të pikëzimit përkatës, të treguar më sipër në këtë Vendim (të pasqyruar edhe në tabelat përkatëse që gjenden në faqen zyrtare Gjykatës së Lartë, në Rubrikën KED), në funksion të procedurave ligjore të përzgjedhjes së gjyqtarit të Gjykatës Kushtetuese dhe për efekt të renditjes së kandidatëve për vendet vakante në të cilat ka kandiduar, Këshillit të Emërimeve në Drejtësi i rezulton se kandidatja Alma Faskaj (Vokopola) reflekton profilin e kandidates si nëpunëse e lartë e shtetit në disa pozicione të ndryshme, që i japin asaj një kuptim gjithpërfshirës rreth gjykimit kushtetues, rolit dhe veprimtarisë së Gjykatës Kushtetuese, me cilësi të mirë argumentimi (qartësi, saktësi, analizë dhe referencë të standardeve), me fokus në të drejtat e njeriut, aksesin në drejtësi, proces të rregullt dhe komunikim institucional dhe me ekspertizë materiale të fituar nga praktika para një organi me rang kushtetues.

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302

86. Duke peshuar në mënyrë të integruar të tre blloqet dhe provat e dosjes, zbatimi simetrik i metodologjisë, bën që kandidatja të marrë një total prej **700 pikë**, ose e përkthyer në një rezultat total mesatar proporcional, bindës dhe të qëndrueshëm në leximin kolegial, prej **77,77 pikë**.

PËR KËTO ARSYE:

Në mbështetje të pikës 1 të nenit 149/d të Kushtetutës, të nenit 7/a dhe 7/ç të ligjit nr. 8577/2000 “ *Për organizimin dhe funksionimin e Gjykatës Kushtetuese të Republikës së Shqipërisë*”, të nenit 239 dhe 240 të ligjit nr. 115/2016 “*Për organet e qeverisjes së sistemit të drejtësisë*”, të pikës 3, 5, 6, 7, 8, 9, 10 e vijues të Vendimit të Këshillit të Emërimeve në Drejtësi nr. 5 datë 02.04.2019 “*Për Kriteret dhe Procedurën e Vlerësimit, Pikëzimit dhe Renditjes së Kandidatëve për Pozicionet Vakante në Gjykatën Kushtetuese dhe të Inspektorit të Lartë të Drejtësisë*”, Këshilli i Emërimeve në Drejtësi

VENDOSI:

1. Vlerësimin e kandidates Alma Faskaj (Vokopola) me **77.77 Pikë**, në vendin vakant për gjyqtar në Gjykatën Kushtetuese, të shpallur nga, Gjykata e Lartë në datën datë 11.12.2024.
2. Në zbatim të nenit 238 të Ligjit nr.115/2016, ky vendim i njoftohet kandidates Alma Faskaj (Vokopola).
3. Ky vendim publikohet në faqen zyrtare të Gjykatës së Lartë, në pjesën e përcaktuar për Këshillin e Emërimeve në Drejtësi.

ANËTAR

Zv/KRYETARE

KRYETAR

Ilir Toska

Marjana Semini

Sokol Sadushi

ANËTARE

ANËTAR

ANËTARE

Alma Muça

Fuat Vjerdha

Enkela Vlora

ANËTARE

ANËTAR

ANËTARE

Irma Balli

Etien Kapo

Nafije Hasko

Këshilli i Emërimeve në Drejtësi 2025

Adresa Postare : GJYKATA E LARTË, Rruga Ibrahim Rugova, Ndërtesa nr. 20, Kodi Postar 1001, Tiranë, Shqipëri.

Adresa Elektronike : info@ked.gov.al Numra telefonikë : +355 4 2257302